

DOMHNALL—Tha fhios gur furasda sin fhaotainn a mach! Innsibh dhòmhsa na thàtar a' cosg air rathaidean-móra, agus air cuideachadh-airgid do na tuathanaich is croitearan, agus air pension na seann-aoise, agus pàidheadh nan dotairean, agus cosgais nan sgoilean, is gach nì eile—agus théid mise an urras nach bi mi fhéin fada a' cùntas suas làn-shùim an airgid sin, beag 's gun d'fhuair mi de sgoil.

MAIGHISTIR-SGOILE—Seadh, a Dhòmhnaill, agus gu dé mu'n airgead mhór a tha Breatann a' cosg air dìon na rìoghachd—feachdan mara is tìre is adhair? Ciamar a roinneadh sibh a' chosgais sin eadar Alba is Sasann?

DOMHNALL—'S docha nach biodh e cho soirbh 's a shaoil mi.

MAIGHISTIR-SGOILE—'S e nach bitheadh. Ach tha *Catto* de'n bheachd gun gabhadh a' cheist fhuasgladh, gu ìre mhath co-dhiùbh, ged a b'ann le mór-shaothair. Seall a rithis na cìsean a tha air nithean a cheannaichear anns a' bhùth. Prìs unnsa tombaca is gloine uisge-beatha—.

DOMHNALL IS DONNCHADH (á beul a chéile)—Ochan, ochan! Chunnaic sinne là eile!

MAIGHISTIR-SGOILE—Tha a' mhór-chuid de'n phrìs sin a' dol ann an cìs. Ach faodaidh an tombaca is an t-uisge-beatha sin iomadh car is cuairt a chur dhiubh mus ruig iad bùth Shomhairle. Ciamar a tha sibh a' dol a roinn na cìse sin eadar Alba is Sasann?

DOMHNALL—Gnothach doirbh, tha mi an dùil! Bheireadh sin deuchainn do'n bhancair mhór fhéin!

MAIGHISTIR-SGOILE—Bheireadh, ach tha *Catto* ag ràdh gun téid aca, ma thogras iad, air cur an cèill na tha an Rìoghachd a' trusadh á pòcaidean sluagh na h-Albann, agus na tha iad a' cur air ais anns na pòcaidean sin. Ach tha nì eile ann, agus chan eil *Catto* idir a' faicinn dòigh air cuid na h-Albann a chùntas air leth bho chuid Shasainn.

DOMHNALL—Agus gu dé sin?

MAIGHISTIR-SGOILE—Tha so. Tha móran malairt 'ga dhèanamh eadar Alba is Sasann, agus tha an dà dhùthaich le chéile a' dèanamh malairt ri dùthchannan eile, ag reic is a' ceannach gach seòrsa badhair. A nis, tha móran de na buidhnean-malairt is de na tighean-marsantachd an diugh is bùthan aca air feadh na rìoghachd gu léir. Agus chan eil *Catto* a' faicinn dòigh air luach na malairt sin a roinn a mach gu cothromach eadar Alba is Sasann. Ged a chuireadh iad tighean-cuspainn air a' Chrich Shasannaich bho Abaruig gu Gretna, bu doirbh dhaibh ionmhas malairt an dà dhùthcha a dhealachadh 'na dhà earrainn—earrann Albannach is earrann Shasannach. So aon eisimpleir air cho doirbh is a tha an gnothach. An uair a chaidh am bàta-smùide mór, *A' Bhan-rìgh Ealasaid*, a thogail air Cluaidh, bha luach nam muilleanan airgid innte, ach chuidich iomadh làmh 'na togail a chòrr air na làmhan a chuir ri chéile i air Bruaich Chluaidh. Is iomadh ceàrn de Shasann is de Albainn a chuir rud innte. Bhiodh e gu tur eu-comasach a ràdh gu dé a' phàirt de chosgais a' bhàta sin a bhuineadh do Albainn agus ciod a' phàirt a bhuineadh do Shasann.

DOMHNALL—Is fìor sin, ach ciod idir a' bhuil a bh'air saothair *Chatto* is a chuideachd?